

Til Austrheim kommune

Merknad til kommuneplanen sin arealplan i Austrheim for 2017- 2027

Bakgrunn for merknaden min:

Namnet mitt er Aashild Helene Hedstrøm og eg er født i Børilden i 1946. Etter at eg vart pensjonist, flytta eg attende til kommunen og trivs svært godt, ikkje minst p.g.a den friske naturen. Eg ville gjerne bli betre kjent i kommunen og glad i å gå på tur. Det var slik eg oppdaga Øksnesmarka. Her var det store, opne landskap med **torvmyrer, lyngheier, småvatn med aure, steingardar og restar av torvhus** og så var det **nesten fritt for sikkagran** som det elles er så altfor mykje av rundt i kommunen. I fylgje bygdeboka bind 3 står det m.a. om Øksneset at området har **fleire interessante naturområde – her lever oter og her veks strandplantar som er sjeldsynte i kommunen. Ørn er og observert her.** Bygdefolket på Øksnes har lagt ned mykje godt arbeid for å ta vare på dei gamle **ferdselstiane og kulturminna** i området og lagt til rette for at både barn og vaksne kan bruka og nytta naturen her.

Då eg første gongen las i lokalavisa at politikarar i kommunen ville bruka ein del av dette naturområdet til å driva næring, vart eg forskrekka, men tenkte at det sikkert ikkje blei særleg oppslutning om noko som ville øydeleggja eit **friluftsområde som var så unikt og populært**. Eg tenkte at ingen ville vel ha **vegar og kaiar, bråk og støy i nærleiken av tuområdet sitt eller i nærleiken av hytte- og bustadområde...** Me har hatt og har Mongstad og veit korleis det er å ha industri tett på. Er det ikkje nok med eit stort industriområde i ein liten kommune, spurde eg meg sjølv...

No har det endeleg gått opp for meg at dette er blodig alvor. Det vart fleirtal i kommunestyre for å bruka ein del av Øksnesmarka til næring. Og eg - som verken er medlem av noko parti eller så veldig engasjert i lokalpolitikken- skjønna at også eg måtte på bana:

Merknad til kommuneplanen sin arealplan i Austrheim for 2017-2027 når det gjeld plan om næringsutvikling i Øksnesmarka

La Øksnesmarka få leva! La dette området som no er det største samanhengande friluftsområdet i kommunen, framleis vera eit LNF område! La bygdefolk og turistar framleis få oppleve og nytta naturen i Øksnesmarka! La folk framleis få vandra langs steingardane på dei gamle stiane, forbi myrar og småvatn der det finst aure og med restar av torvhus som peikar attende på svunne tider, utan å verta uroa av støy frå vegtrafikk og industri! La dette opne landskapet framleis få leva!!!

Kansardalen, 15. februar 2018

Aashild Helene Hedstrøm